

REGIONAL NEWS BULLETIN

HEADLINES (EVENING)

1. Chief Minister Pu Lalduhoman Bana Kaih-Handholding Scheme chu ei leh bara hmasawna mai ni lovin, mipui rilru puthmang thlenga a tha zawnga siam that tumna policy a ni a ti.
2. Mizorama Eirawngbawlna Gas pekchhuah kawngah harsatna lian tham a la awm lo.
3. Union Health Minister J P Nadda chuan Prime Minister Narendra Modia sawrkar chuan a taka thawk politics, rintlak leh hmun kil ber thleng phak sawrkar a siam a ti.
4. Naktukah Sri Lanka President thar thlan a ni dawn.

<><><>

CM

Chief Minister Pu Lalduhoma chuan an sorkar scheme tlangzarh thar, Bana Kaih-Handholding Scheme chu ei leh bara hmasawna mai ni lovin, mipui rilru puthmang thlenga a tha zawnga siam that tumna policy a ni a ti.

Vawiina Mizoram Civil Service Association General Conference vawi 48-na in Aijal Club-a hun a hmanpuinaah Chief Minister chuan he thu hi a sawi a. Langtlang leh mitin huapzo rorelna chu Civil Service kalphung awmsa a nih thu sawiin Chief Minister chuan sawrkar tharin a ngai pawimawh hle a ni a ti a. Handholding Scheme hi ei leh bara hmasawna mai ni lo, mipuite rilru puthmang thlenga siam that tumna policy a nih thu sawiin chu chu ngai pawimawh hmasaka nei zel turin MCS officer te chu a chah a ni.

Chief Minister chuan, kalphung thar chu tha tho taka tuipui turin MCS officer te chu sawmin State dange umphak tura tang turin a chah a. Chief Minister hian MCSA Official Magazine RAHBI (10th Edition) a tlangzarh nghal bawk a ni.

MCSA Kalkhawmte hian resolution hrang hrang an pass a. Sorkar flagship programme ‘The Mizoram Bana kaih (Handholding) Scheme’ chu tha an tih thu leh an awmna hmun theuha theihtawp an chhuahpui tur thu an pass a. Mipuite hnena mamawh tha zawka pek a nih zel theih nan, District, Sub-Division leh Block-a hmasawna ruhrel, tun aia tih changkan a nih theih nan Sorkar-ah thlen ni se tih te an pass a ni.

<><><>

SWACHHATA HI SEVA

Ramchhunga faina beihpui thlak, Swachhata Hi Seva 2024 kalpui mekah vawiin khan Lunglei UD&PA hnuaia self help group (SHG)-te thil siam chhuah pho chhuahna, "Swachh Bharat Mission One Day Cultural Fest" buatsaih a ni.

He hun hmanpuitu, Lunglei Additional Deputy Commissioner Pu James Miahlung chuan kum 2014 atangin Swachh Bharat Mission hnuaiah faina kawngah ngawrh takin hma lakna kalpui a nih thu a sawi a. He hma lakna hi khua leh tui zawng zawng thawhona tur a nih angin mitinin a hlawhtlin nan mawh an phur theuh a ni, a ti a. SHG-te'n cultural fest-a an thil siam chhuah an pho chhuak thei chu lawmawm a tih thu sawiin, SHG chu ei zawna mumal nei lote ei zawna siamsaktu leh mi retheite khai chhuahna atana sawrkarin a ruahman a nih angin Lunglei District-a SHG 1,200 chuang awmte'n tih tak taka hma an lak chuan khua leh tui tam takin din chhuah nan an hmang thei dawn a ni a ti.

Swachh Bharat Mission Cultural Fest buatsaihah hian stall 18 awmin, UD&PA hnuaia SHG 15 leh mimal 3 te'n an thil siam chhuah leh thlai thar chhuah chi hrang hrang chu mipuiin an en tur leh an lei theih turin an pho chhuak a ni.

<><><>

SUPPLY

Mizorama Eirawngbawlna Gas pekchhuah kawngah harsatna lian tham a la awm lo.

Vawiina Food Civil Supplies and Consumer Affairs (FCS&CA) Minister Pu B Lalchhanzova hova Supply Department hotute leh Mizoram LPG Distributor ten eirawngbawlna gas dinhmun an sawiho naah he thu hi tarlan a ni a, Minister chuan Mizoram in chak lakna kawngah harsatna a tawh mek laia Eirawngbawlna Gas harsatna lian lutuk awm lo tura theihtawp chhuahtu Supply Department hotute, Indian Oil Corporation hotute leh Mizoram LPG Distributor te chungah lawmthu a sawi a, heihtawp chhuaha tan la chhunzawm turin a chah a ni.

Meeting in rawtna a siam angin Mizoramin hniang hnar taka eirawngbawlna Gas a hmuh zel theih nan Indian Oil Corporation Limited hotute hnenah FCS&CA chuan lehkha a thawn nghal bawk a ni.

<><><>

CBC

Vawiin khan CBC, Field Office, Aizawl bultum in Aizawl Nursery Venga M/S Centreah " POSHAN MAAH, 2024 pualin hun hman a ni.

CBC Aizawl in-charge Pu Lalginlen Lhouvum kaihruai he hunah hian Nursery Local Council President Pu. Ch. Lalnunmawia chuan he hun pawimawh leh hlu tak mai an venga buatsaih a ni chu lawmawm a tih thu leh, kalkhawm ten an hlawkpui ngei a beisei thu a sawi a ni.

He huna Resource Person, Poshan Abhiyan Women & Child Development Consultant Pu. Michael Lalneitluanga chuan fate enkawlnaah ei tur tha pek baka hmalam hun tur thlir thiampui a pawimawh thu a sawi a. An rilru pawh a tha zawnga kaihruai tura chahin an duh zawng chauh ei lova an taksa tana tha tur thei leh thlai ei tam turin a chah a. Chaw eikham darkar khat hmaa thingpui in lo turin a chah bawk a ni.

He hunah hian Quiz competition neih niin lawmman pawh sem nghal a ni.

<><><>

METH SEIZED

Nimin khan CID Crime hnuai Special Narcotics PS leh BSF, Aizawl tangkawp chuan Seling khaw daiah methamphetamine tam tham tak man a ni.

Nimina beihpui an thlakah Seling OP Filling Station bulah lirthei pakhat chu tidingin an dap hnuah Methamphetamine ni ngeia hriat, Kg 39 chuanga a rit, cheng nuai 515, sing 1 & 1,200 man hu chu lirthei khalhtu MD Jahir Hussien, kum 23, Mangalkhali, Jubaraj Nagar, Dharmanagar Urban, North Tripura District nia inchhal kut atangin an man.

Hemi chungchangah hian chhui chhonzawm leh dan anga hma lak chhonzawm zelna turin Special Narcotics PS Case, ND&PS Act hnuai thubuai ziah luh nghal a ni.

<><><>

GARBAGE VEHICLES TO PROTEST FROM MONDAY

Aizawl khawpui chhunga bawlhhlawh paih lirthei hman man rualkhai leh mumal siam phutin bawlhhlawh paih lirtheite tun thla ni 23, Thawhtanni lo awm tur atang khian an tlan dawn lo.

Vawiina Aizawl Garbage Truck Owners' Association (AGVOA), PPP Mode Bawlhhlawh Paih Welfare leh Sanitation Driver & Handyman Association (SD&HA) ten Aizawl Press Club-a chanchinbumite an kawmnaah Thawhtanni atanga an din tur thu hi an sawi a. Pawl pathumte chuan bawlhhlawh paih motor hman man rualkhai leh mumal zawk, veng tin hlat dan mil zela siam tha turin AMC thuneitute hnenah vawi engngemaw zat an lo thlen tawh tih an sawi a. AGVOA chuan October ni 25, 2019 atang khan Bawlhhlawh paih motor hman man siam tha tur hian lehkhain vawi 8 lai an lo thlen tawh tih an sawi a, hei bakah hian PPP Mode Bawlhhlawh Paih Welfare-te pawhin bawlhhlawh paih motor hman man siam tha tura ngenna vawi eng emaw zat an lo thlen tawh tih an sawi baw k a.

Hetichung hian vawiin thlengin bawlhhlawh paih lirthei hman man veng hrang hrang hlat dan mil pawh ni lo, a kilometer ang zawnnga chhuta 'rate' inanglo tak an la hmang mek chu pawh an tih thu pawl pathum chuan an sawi a. Dik tak leh rualkhai taka bawlhhlawh paih lirthei hman man bithliah an duh ber chu rei tak an nghah hnuah pawh heti mai hi an dinmun anih avangin Aizawl khawpui chhung mipui bawlhhlawh khawntu, AMC bithliah rate hmangtute chuan Thawhtanni atangin, 'Tiam chin awmlo va din vek tur' an ti ta tih an sawi.

Bawlhhlawh paih motor hi LMV, pick-up truck leh a tlukpui 69 leh MMV, 407 leh a tlukpui 82, a vaiin lirthei 151 a tlan mek a ni.

<><><>

MPCC FRIDAY SESSION

Mizoram Pradesh Congress Committee MPCC Gen Secy Pu Joseph Lalhimpuiian July ni 2-a Lungleia Council of Minister Meeting ah Aizawl atanga official kal, Chief Minister atanga peon thlengin mi 134 an ni a, cheng nuai tam tak senral a ni a ti.

Vawiina MPCC Friday Political Session ah thusawiin Pu Joseph Lalhimpuiian chuan Mizoram a la awm ngailo, Council of Minister meeting chu boruak lian tak hnuai neihah Lungleia DC leiba cheng nuai 3 sing 2 & 1565 bakah HPC sum nuai 1 sing 1 & 6800 hman ani a, Aizawl atanga official kal mi 134 te thlenna leh TA/DA senso nuai tam tak ala awm cheu baw k a ti a ni.

ZPM councilor ten thla 16 an hmang ve chauh chungin an lawmman chu za zelah 106 lain an tipung a, Municipal sum tuak nan parking fee an ti to nghal tih

sawi bawkin Council of Minister meeting a thural 14 atanga 6 an pass zinga 2 chu mipui phurrit siamtu a ni tih sawiin Pu Joseph Lalhimpua chuan Petrol leh Diesel man tih san vakna leh LMC lawmman reilote chhunga zaa 106 a tihpunna a ni a ti a. ZPM LMC hlawh punna tur a meeting atanga ni sarih chhung, ni hnih chawlh awm bawk chungin order a chhuak hman a, hlawhpung hma leh pung tam, order chhuak hma record ani thei a ni a ti.

Pu Joseph Lalhimpua chuan ZPM sorkar hnuaiiah ran vulhtuten duhsak an hlawh lo hle a ti bawk a, kumin January atanga September ni 19 thleng a ASF avangin Vawk thi zat Sawrkar record ah chu 12756 a ni tih sawiin hri avang a Vawk thi hi chawh rualin inches 35 lo ni ta se, Market rate anga chhutin cheng vbc 100 chuang lai a tling a, in report lo an tam hle ang tih hriat a ni a, hei hi Mizoram chhunga vawk, Mizote vulh a ni a, state economy a nghawng nasat dan tur chu rapthlak tak a ni a ti. ZPM sawrkar, mi dangte aia tha a insawi hian vawkvulhtute tanpui dan tur mutmawh hnarmawhah anla nei chuang lo a ni a ti.

Vawk pul hri chungchang bakah, kawng chhia chungah ah leh hmunphiah chungchangah te a changtu minister te chet theih loh dan enin, PC party mi lo ni tawh an nih avanga an party chhunga enhran hlawh an ni thei em tih chu an thlirna pakhat a nih thu Pu Joseph Lalhimpua chuan a sawi a ni.

<><><>

NDA 100 DAYS

Union Health Minister J P Nadda chuan Prime Minister Narendra Modia sawrkar chuan a taka thawk politics, rintlak leh hmun kil ber thleng phak sawrkar a siam a ti. NDA sawrkar kum 100 tlin chungchanga New Delhi-a chanchinbumite a kawmnaah he thu hi sawiin Pu Nadda chuan sawrkarin Ayushman Bharat-Pradhan Mantri Jan Arogya Yojana chu a tilian tih sawiin kum 70 chunglam tana tihlen a ni a ti a. Khawtlanga an dinhmun en loin he hamthatna hi pek vek an ni dawn a ti a. Ramchhunga kum upa vaibelchhe ruk chuang tuam a ni dawn tih sawiin chhungkaw vaibelchhe 4.5 in he healthcare hi an dawng dawn a. Damlo inenkawlina kumtin cheng nuai 5 an dawng thei dawn tih a sawi. Pu Nadda hian NDA sawrkar ni 100 chhunga hmalakna hrang hrang a tarlang bawk a ni.

<><><>

SRI LANKA ELECTION

Naktukah Sri Lanka President thar thlan a ni dawn. Rampumah polling station sing1 leh sang 3 chuang siam a ni a. President inthlanah hian candidate 38 awmin vote nei hi maktaduai 17 chuang an awm a. Candidate zingah tling ngei tura inbeisei an awm a, hetihruah hian mithiamte chuan vote chhiar thawhkhathnaah tling zo an awm an ring lo thung a. Election Commission chuan inthlan tuang taka neih a nih theih nan ruahmanna tha tak an siam tih an sawi a. Pathianni ah inthlan result puan a ni ang. President tanglai Ranil Wickremasinghe chuan tlin leh tumin a in candidate leh a. A khingpui lian pahnihte hi SJP candidate Sajith Premadasa leh NPP hruaitu Anura Kumara Dissanayaka te an ni.

<><><>